

Resolución Reitoral, do 27 de xaneiro de 2021, para a adecuación da actividade docente na Universidade de Vigo ás novas restricións adoptadas pola Xunta de Galicia na mesma data por razón da pandemia causada pola COVID-19

Á vista do decreto 8/2021, do 26 de xaneiro, polo que se adoptan medidas no territorio da Comunidade Autónoma de Galicia para facer fronte á crise sanitaria, na condición de autoridade competente delegada no marco do disposto polo Real decreto 926/2020, do 25 de outubro, polo que se declara o estado de alarma para conter a propagación de infeccións causadas polo SARS-CoV-2, publicada no DOG do 26 de xaneiro do 2021 (nº 16-bis), polo que a asistencia a centros universitarios queda excluída das limitacións de entrada e a saída de persoas do ámbito territorial de cada un dos concellos da Comunidade Autónoma de Galicia considerados individualmente, así como as actividades nos mesmos exclúense asemade das limitacións á permanencia de grupos de persoas en espazos de uso público, tanto pechados como ao aire libre;

Á vista da Orde do 26 de xaneiro de 2021 pola que se establecen medidas de prevención específicas como consecuencia da evolución da situación epidemiolóxica derivada do COVID-19 na Comunidade Autónoma de Galicia, na que se recomenda que as actividades en centros universitarios se realicen de forma telemática sempre que sexa posible; na que se sinala que a actividade docente nas ensinanzas universitarias correspondente ao segundo cuatrimestre comezará, nas tres universidades públicas galegas, o luns 8 de febreiro, restablecéndose a docencia exclusivamente en modalidade non presencial durante o período ao que se estenda a eficacia da medida conforme ao punto cuarto da orde, podendo manterse as probas de avaliación das materias do primeiro cuatrimestre nas datas e modalidades previstas en cada universidade; e na que se establecen diferentes disposicións que afectan ás instalacións e servizos da Universidade,

Esta Reitoría

RESOLVE

Primeiro: que todas as actividades docentes de grao, mestrado e doutoramento do segundo cuatrimestre sexan adiadas ata o 8 de febreiro, suspendéndose ata ese día aquelas que xa comezaran, e pasando á modalidade en liña entre o 8 e o 17 do dito mes, ambos inclusive; sen prexuízo da realización doutro tipo de actividades preparatorias xa previstas na semana do día 1 ao 5 febreiro, sempre que os centros consideren necesario levalas a cabo e as autoricen, e unicamente na modalidade en liña, procurando a menor alteración posible no normal desenvolvemento da docencia de cada profesor ou profesora. O indicado tamén é aplicable a todas as titulacións propias e actividades de extensión universitaria que contemplan actividade docente.

Segundo: que as probas de avaliación fixadas para o primeiro cuatrimestre continúen a celebrarse no xeito presencial previsto, agás nos casos excepcionais xa establecidos nos protocolos de actuación fronte á pandemia e, en particular, na instrución da vicerreitoría de captación de alumnado, estudantes e extensión universitaria, do 7 de decembro de 2020, sobre medidas docentes aplicables ao estudantado da Universidade de Vigo por mor da pandemia da COVID-19; sen prexuízo de que os centros poidan levar a cabo os axustes

menores que entendan oportunos, de tempo ou de espazos, de cara a facilitar o escalonamento das probas, para garantir o cumprimento das medidas de prevención, e que, de establecerse, deberán ser comunicados en todo caso ás persoas interesadas coa debida antelación; sen que todo o indicado neste punto altere o prazo de entrega de actas, que se mantén en principio no venres 19 de febreiro do 2021, agás que se dispoña expresamente o contrario e así se comunique.

Terceiro: que a revisión das probas de avaliación indicadas no punto anterior pase a desenvolverse de xeito telemático, preferentemente síncrono e individual, en dependencia da natureza da proba realizada, garantindo en todo caso o dereito do alumnado a coñecer as razóns que xustifican a avaliación finalmente obtida.

Cuarto: que todas as actividades titoriais pasen a desenvolverse de xeito telemático.

Quinto: que o practicum e as prácticas curriculares e extracurriculares tanto en empresas como noutros organismos e institucións situadas na Comunidade Autónoma pasen a efectuarse na modalidade de teletraballo, sempre que sexa posible. No caso de non ser posible, estas actividades suspenderanse mentres estea en vigor a presente resolución.

Sexto: que as defensas públicas de TFG, TFM e teses de doutoramento pasen a celebrarse en liña.

Sétimo: que as comisións dos centros con competencia en materia de organización académica adopten as medidas necesarias, de ser o caso, para axustar ao novo calendario os seus horarios e a celebración das distintas probas de avaliación continua previstas, así como todos os aspectos relativos ao normal desenvolvemento da súa actividade docente. O Consello de Goberno levará a cabo unha modificación do calendario académico para adecuarse a estes axustes, que incluírá o adiamento do final do segundo cuadrimestre e da entrega das actas.

Oitavo: restrinxir ata novo aviso as actividades nas instalacións universitarias ao persoal con contrato en vigor coa Universidade. Malia o indicado, os membros da comunidade universitaria e o público en xeral poderán acceder a estas para realizar xestións presenciais, mediante o sistema de cita previa.

Noveno: ata novo aviso so poderá acceder ás dependencias das bibliotecas da Universidade o persoal adscrito á Biblioteca Universitaria . O PDI con contrato en vigor coa Universidade poderá seguir facendo uso dos servizos que a Biblioteca Universitaria establece como instrumentos de investigación e docencia, mediante o sistema de cita previa

Décimo: ata novo aviso so poderá acceder ás instalacións e pavillóns deportivos da Universidade o persoal adscrito ao Servizo de Deportes. Porén, a Vicerreitoría de Planificación e Sostibilidade poderá autorizar o uso destas instalacións para a realización de probas presenciais correspondentes ao primeiro cuadrimestre.

Undécimo: que o PDI e o PAS da Universidade continue realizando a súa actividade laboral na mesma modalidade na que o viñan facendo ata a entrada en vigor da presente resolución.

Duodécimo: que a presente resolución entre e vigor ao mesmo tempo que as novas restricións previstas no DOG do 26 de xaneiro do 2021 e que estea vixente durante todo o período de duración das mesmas, agás que se dispoña o contrario nunha nova resolución reitoral.

O Reitor